

Governu entrega proposta OJE Retifikativu ba Parlamentu Nasionál

Vise-Ministru Asuntus Parlamentares, Adérito Hugo da Costa, no Vise-Ministru Finansas, Helder Lopes, ohin loron 10 fulan-agostu tinan 2023, entrega ona projetu Proposta Lei Orsamentu Retifikativu tinan



2023 ba Prezidente Parlamentu Nasionál interinu, Alexandrino Afonso Nunes.

Ho projetu Proposta Lei ida ne'e, despeza total husi Setór Públiku Administrativu tinan 2023 ho valór total konsolidadu dolar amerikanu 1.771.867.112. Administrasaun sentral iha despeza ida ne'ebé prevee ho valór dolar amerikanu 1.633.000.000. Seguransa Sosiál, sein Fundu Rezerva Seguransa Sosiál, ho montante dolar amerikanu 130.965.306 (iha valór total konsolidadu la kontabiliza montante dolar amerikanu 75.860.306 husi Seguransa Sosiál ne'ebé mai husi transferénsia administrasaun sentral hodi evita ninia kontajen duplikada). Rejiaun Administrativa Especial Oe-Cusse Ambeno (RAEOA) ninia valor estimado mak 83.762.112.

Hafoin eleisaun parlamentár loron 21 fulan-maiu tinan 2023 no simu pose Governu Konstitusionál IX nian, aprova ona orgánika foun Governu, nune'e presiza halo ajuste balun iha título klasifikasaun orgánika Orsamentu Jerál Estadu nian.

Haree ba dados ezekusaun orsamentál to'o ohin loron no Governu nia hanoin atu imprime kontensaun iha kontas públicas, ba efisiénsia iha uzu osan públiku no efikásia boot liu iha investimentu públiku, halo ona ezersísiu avaliaun boot ida-ne'ebé rezulta identifikaun ba poupança iha servisu oin-oin no entidade Setór Públiku Administrativu no ne'ebé justifika redusaun despeza ida ne'ebé prevee ona iha Orsamentu Jerál Estadu tinan 2023, nune'e mós montante transferénsia husi Fundu Mina-rai.

Hanesan propoin ona iha ninia programa, Governu Konstitusionál da-9 hakarak hamenus impaktu inflasaun no aumentu kustu vida ba sidadaun sira, hodi aumenta sira-nia poder kompra nian. Ba ida ne'e, halo ajustamentu ida ba taxa impostu seletivu konsumu no direitu aduaneiru nian ba importasaun ne'ebé bele aplika iha tinan 2023, ne'ebé aumenta iha inísiu tinan ne'e, liuhusi Lei n. 15/2022, loron 21 fulan-dezemburu, Orsamentu Jerál Estadu ba tinan 2023 nian.

Tanba ne'e, halakon taxa impostu seletivu konsumu kona-ba masin-midar, nune'e mós aumentu ba direitu aduaneiru importasaun nian, no aplika filafali taxa anteriór ho 2,5%.

Governu mós aproveita hodi halo alterasaun ba diploma boot rua ne'ebé iha ligasaun besik ho Orsamentu Jerál Estadu, iha Lei n. 2/2022, loron 10 fulan-fevereiru, Enkuadramentu ba Orsamentu Jerál Estadu no jestaun financeira pública, no iha Lei n. 8/2008, loron 30 fulan-juñu, Lei Tributária, ne'ebé altera husi Lei n. 5/2019, loron 27 fulan-agostu, ho objetivu atu asegura rigór no transparénsia ida ne'ebé boot iha ezekusaun Orsamentu Jerál Estadu no kontas públicas nian. Alterasaun ida-ne'e inklui mudansa iha alterasaun orsamentál, hodi garante estabilidade boot ba Orsamentu Jerál Estadu ne'ebé aprova ona, eliminaun ba lei Planu Opsaun Prinsipál, ne'ebé kria hodi troka nia fatin maka Planu Anuál Investimentu Estratéjiku, dokumentu tékniku ida ne'ebé apresenta planeamentu anuál ho impaktu ba orsamentu ne'ebé apresenta hamutuk ho proposta lei Orsamentu Jerál Estadu, no ajuste ba rejime ezekusaun orsamentál iha período entre nomeasaun Governu no apresiasaun programa Governu nian, nune'e mós iha período entre rejisaun programa Governu no nomeasaun Governu foun.